

Bosna i Hercegovina
FEDERACIJA BOSNE I HERCEGOVINE
ZENIČKO-DOBOJSKI KANTON
GRAD ZENICA
JU OŠ „MIROSLAV KRLEŽA“ ZENICA

PRAVILNIK O KUĆNOM REDU SA ETIČKIM KODEKSOM

Zenica, august 2018. godine

Na osnovu člana 41. Zakona o osnovnoj školi („Službene novine Zeničko – dobojskog kantona“, broj 3/18.) i člana 175 PRAVILA JU Osnovne škole „Miroslav Krleža“ u Zenici, nakon usaglašenog prijedloga Vijeća roditelja i Nastavničkog vijeća, Školski odbor na 41. sjednici održanoj 28.08.2018. godine, donosi:

PRAVILNIK O KUĆNOM REDU SA ETIČKIM KODEKSOM

I OPĆE ODREDBE

Pojam etičkog kodeksa

Član 1.

Etički kodeks učenika je skup načela i shvaćanja, pravila, običaja i društvenih normi u Osnovnoj školi „Miroslav Krleža“ Zenica, kojima se definiše moralno ponašanje učenika i njihovi međusobni odnosi.

Cilj Etičkog kodeksa

Član 2.

Cilj Etičkog kodeksa je poticati razumijevanje i prihvaćanje temeljnih načela moralno opravdanoga ponašanja te njihovu primjenu u Osnovnoj školi „Miroslav Krleža“ Zenica. Sprovođenje etičkih vrijednosti i etičkog ponašanja u ovom kodeksu obaveza je svih učenika škole.

Član 3.

Etički kodeks ima sedam poglavlja :

- odnos prema nastavi,
- odnos prema nastavnicima i zaposlenicima,
- odnos prema učenicima,
- odnos prema sredini u kojoj se škola nalazi,
- ponašanje u prostoru škole,
- ponašanje u učionici,
- zabrana korištenja aparata/mobitela.

II ODNOS PREMA NASTAVI

Član 4.

Učenici trebaju dolaziti na nastavu na vrijeme, s potrebnim priborom i opremom za rad i uredno urađenim domaćim zadaćama.

Član 5.

Tokom nastave učenici trebaju biti pažljivi, mirni i disciplinovani, a za sobom ostavljati čist i uredan radni prostor.

Član 6.

Svako izostajanje sa nastave učenik je dužan da pravda dolaskom roditelja ili staratelja, najkasnije u roku do tri dana nakon odsustva iz škole. U slučaju bolesti, potrebno je donijeti ljekarsko uvjerenje.

Član 7.

Tokom nastave nije dozvoljena upotreba mobitela, MP³-ja i drugih sličnih uređaja. Konzumiranje jela za vrijeme nastave nije dozvoljeno, osim u izuzetnim slučajevima i po odobrenju nastavnika.

Član 8.

Učenik je dužan da prije početka časa uđe u učionicu prije nastavnika.

Član 9.

Učenik ne može napustiti čas bez odobrenja nastavnika koji vodi taj čas. Eventualni izlazak iz učionice za vrijeme trajanja časa odobrava nastavnik. Učionicu u isto vrijeme u pravilu može privremeno napustiti samo jedan učenik.

Član 10.

Svi učenici odjeljenja obavljaju dužnost redara, a imenuje ih razrednik i to po dva redara sedmično.

Redari su odgovorni za :

- prijavu odsutnih učenika predmetnom nastavniku ,
- čistoću učionice, školske table, pripremu nastavnih sredstava i pomagala,
- prijavljivanje uočenih šteta u učionici predmetnom nastavniku,
- prijavu ostalih vidova ponašanja, koji nisu u skladu sa ovim Kodeksom, predmetnom ili dežurnom nastavniku.

Član 11.

Učenik je odgovoran za dolazak u školu u prikladnoj odjeći koja ima pristojan izgled primjeren mjestu na kome se nalazi. Neprikladno je dolaziti u kratkim suknjama, šorcevima, majicama na bretele i sa velikim dekolteima, otkrivenog stomaka, nečiste i neuredne kose, te nije dozvoljeno farbanje kose i šminkanje.

Na odjeći nisu dopušteni vulgarni i opće neprihvatljivi simboli.

III ODNOS PREMA NASTAVNICIMA I ZAPOSLENICIMA

Član 12.

Učenici su dužni poštovati nastavnike i sve zaposlenike škole, uljudno se ponašati, pozdravljati i korektno izvršavati svoje obaveze.

Član 13.

Učenicima je zabranjeno vrijeđati dostojanstvo nastavnika i ostalih zaposlenika, na bilo koji način.

Član 14.

U školi učenici su dužni pozdravljati pozdravom: „dobro jutro“, „dobar dan“, „dobra večer“ i „doviđenja“. Učenici pozdravljaju sve nastavnike, bez obzira predaju li im ili ne, te sve zaposlenike škole i posjetioce škole.

IV ODNOS PREMA UČENICIMA

Član 15.

Nije dopušteno vrijeđati i omalovažavati učenike iz svog i ostalih odjeljenja.

Nesuglasice i sukobe potrebno je rješavati nenasilno i dogovorom.

Član 16.

Nije dopuštena diskriminacija na vjerskoj, nacionalnoj, polnoj, rasnoj ili bilo kojoj drugoj osnovi (vanjski izgled, sposobnost, zdravstveno stanje ...).

Član 17.

Učenici trebaju graditi korektan međusobni odnos, poticati nenasilno rješavanje problema, poštovati različitost i privatnost drugih učenika (uvažavati i prihvatiti različite potrebe, osobine ličnosti, uslove života u porodičnom domu ...), njegovati prijateljske odnose, uvažavati druge i drugačije te održavati, podržavati i poticati odnose međusobnog poštovanja i tolerancije.

V ODNOS PREMA SREDINI U KOJOJ SE ŠKOLA NALAZI

Član 18.

Učenici su dužni ličnim ponašanjem i odgovornim pristupom radu čuvati ugled Osnovne škole „Miroslav Krleža“, čuvati okoliš i svojim postupcima poticati ekološku svijest.

VI PONAŠANJE U ŠKOLI

Član 19.

Učenici su dužni ponašati se uljudno i korektno, u skladu s pisanim i nepisanim pravilima kućnog reda osnovne škole „Miroslav Krleža“ Zenica.

Učenicima nije dopušteno za vrijeme nastave napuštati školski prostor, bez dozvole nastavnika ili razrednika.

Član 20.

Zabranjeno je unošenje predmeta sa oštrim sječivom ili ubodnih predmeta, petardi, upaljača i drugih predmeta koji mogu povrijediti učenike i ugroziti opštu sigurnost.

Član 21.

Učenici su dužni čuvati svoju odjeću, obuću, školska sredstva i pribor, kao i imovinu drugih učenika. Donošenje skupocjenih predmeta i novca u školu je na ličnu odgovornost učenika. Ako isti nestanu, učenik ne može kriviti druge. Škola ne preuzima odgovornost za gubitak ili krađu lične imovine.

Član 22.

Za štetu nastalu u školi odgovaraju njeni počinitelji. Počinitelji štete dužni su je u cjelini nadoknaditi što ovisi o okolnostima i uzrocima počinjene štete, te odluci Komisije za procjenu materijalne štete. Ako se počinitelji ne mogu poimenično utvrditi, štetu će namiriti svi učenici koji su se zatekli na mjestu u vrijeme učinjene štete.

Član 23.

Informacija o nađenim stvarima saopštava se dežurnom nastavniku.

Član 24.

Učeniku koji svjesno i namjerno otuđi ili ošteti školske stvari ili stvari drugih učenika, izriče se odgojno-disciplinska mjera jer se otuđenje ili oštećenje školske stvari ili stvari drugih učenika smatra težim prekršajem.

Član 25.

Za vrijeme odmora pri mijenjanju učionica, na stepeništu i u hodnicima, učenici ne smiju praviti gužvu, buku i gurati se, kako ne bi došlo do povređivanja. Prilikom penjanja ili silaska niz stepenice učenici se obavezno kreću svojom desnom stranom.

Član 26.

Učenici ne mogu dovesti u školu druge osobe, koje za to nemaju odobrenje od Uprave škole.

Član 27.

U školu i školsko dvorište je zabranjeno unošenje i upotreba cigareta, alkohola ili drugih narkotičkih sredstava .

Član 28.

Vannastavne aktivnosti (projekti, pripreme za takmičenje, probe za priredbe u školi) učenik treba da obavlja prije ili poslije časova.

Član 29.

U slučaju nedolaska ili kašnjenja predmetnog nastavnika, učenik je obavezan da ostane u učionici dok ga dežurni nastavnik ili predsjednik odjeljenja ne obavijesti o suprotnom.

Član 30.

Sve primjedbe i žalbe učenici mogu uložiti preko razrednika ili svog predstavnika u Vijeću učenika.

VII PONAŠANJE U UČIONICI

Član 31.

Učenici su dužni:

- pažljivo slušati nastavnika/cu i izvršavati zadane zadatke!
- tiho raditi i ne ometati ostale učenike!
- strpljivo slušati dok drugi govore!
- podići ruku prije nego što nešto kaže/u ili postave pitanje!
- čuvati školski pribor, namještaj i sve ostalo u učionici!
- iz učionice izlaziti bez trčanja, guranja i galame!

VIII ZABRANA KORIŠTENJA APARATA/MOBITELA

Član 32.

U školi i dvorištu škole zabranjeno je korištenje mobitela. Ako učenik u školu donese mobitel, dužan ga je isključiti (ugasiti). Strogo je zabranjeno korištenje mobitela s namjenom fotografisanja ili snimanja video i audio zapisa u školi i školskom dvorištu.

Za iste u potpunosti odgovaraju sami učenici, a škola smatra da je učenik donio mobitel uz dozvolu roditelja.

U slučaju da se protivno ovom Pravilniku učenik nedozvoljeno koristi mobitelom, nastavnik ga ima pravo oduzeti i predati ga u Upravu škole.

Učeniku kojem je oduzet mobitel zbog kršenja odredbi ovog Pravilnika izdaje se potvrda koja sadrži tačan datum i vrijeme oduzimanja mobitela, razloge zbog kojih je oduzet mobitel i termin razgovora roditelja sa direktorom o navedenom problemu.

Razgovor sa roditeljem se obavlja u prisustvu nastavnika koji je oduzeo mobitel od učenika i učenika.

O obavljenom razgovoru obavezno je sačiniti zapisnik koji se odlaže u pedagoški dosije učenika.

Učestalo ponavljanje povrede Pravilnika iz stava 1. ovog člana povlači za sobom izricanje odgojno-disciplinske mjere prema učeniku.

Škola ne odgovara za oštećenje mobitela, niti za izgubljene ili otuđene mobitele.

Odredba iz stava 1. ovog člana o upotrebi mobitela za vrijeme nastave (časa) odnosi se i na nastavnike kao i sve zaposlenike koji rade s učenicima, kao i na sve roditelje-posjetioce koji su obavezni ugasiti mobitel prilikom ulaska u školu.

Član 33.

U školi je strogo zabranjena upotreba drugih aparata koji omogućavaju video/ili audio snimanje školskih prostorija, radnika ili učenika, osim ako snimatelj ima dozvolu direktora škole.

Jednaka zabrana vrijedi i za fotografisanje. Neovlaštenu upotrebu navedenih aparata škola će tretirati kao kršenje Pravilnika o kućnom redu sa etičkim kodeksom i pravila koja se odnose na zaštitu privatnosti.

IX JAVNOST PRAVILNIKA O KUĆNOM REDU SA ETIČKIM KODEKSOM

Član 34.

Razrednik je dužan sve učenike iz svog odjeljenja upoznati s odredbama ovog Pravilnika.

Član 35.

Učenik je odgovoran za poštivanje ovog Pravilnika, u protivnom će se primjenjivati mjere u skladu sa Pravilnikom o izricanju odgojno – disciplinskih mjera za učenike.

Član 36.

Pravilnik o kućnom redu sa etičkim kodeksom stupa na snagu po proteku osam dana od dana isticanja na oglasnoj ploči Škole.

Ovaj Pravilnik se ističe na vidnom mjestu škole (oglasna ploča).

Ovaj Pravilnik objavljuje se i na web stranici škole.

Sa ovim Pravilnikom moraju biti upoznati svi zaposlenici, učenici i roditelji učenika škole.

Stupanjem na snagu ovog Pravilnika prestaje da važi Pravilnik o kućnom redu, broj:1935/14. od 05.12.2014. godine i Etički kodeks učenika, broj: 214/18. od 21.02.2018. godine.

Djelovodni broj : **1208/18.**

Datum: **28.08.2018.godine**

**PREDSJEDNIK
ŠKOLSKOG ODBORA:**

/ Halilović Enver, prof. /